

Najib Ketuai Delegasi Ke Dialog Perkongsian Bestari Global Di Tanzania
Bernama
28 Jun, 2013

KUALA LUMPUR, 28 Jun (Bernama) -- Perdana Menteri Datuk Seri Najib Tun Razak akan mengetuai delegasi Malaysia ke Dialog Perkongsian Bestari Global di Dar Es Salaam, Republik Bersatu Tanzania bermula esok.

Kenyataan Kementerian Luar hari ini menyebut Perdana Menteri akan diiringi isteri Datin Seri Rosmah Mansor, Menteri di Jabatan Perdana Menteri Datuk Seri Idris Jala, Ketua Setiausaha Negara Tan Sri Dr Ali Hamsa, para pegawai Pejabat Perdana Menteri dan Kementerian Luar.

Kehadiran Malaysia pada dialog empat hari yang bertema 'Memanfaatkan Teknologi bagi Transformasi Sosioekonomi Afrika' menunjukkan komitmen negara bagi menangani isu antarabangsa terutamanya isu penting kepada benua Afrika.

Malah, kehadiran Najib juga akan membantu mengeratkan lagi hubungan antara Malaysia dan negara Afrika, selain meningkatkan hubungan dua hala dengan Tanzania.

Pameran 'Teknologi, Produk dan Perkhidmatan Malaysia' melibatkan penyertaan 28 agensi kerajaan dan swasta juga akan diadakan sebagai acara sampingan semasa dialog itu berlangsung, kata Kementerian Luar.

Dialog Perkongsian Bestari Global dilancarkan pada 1995 semasa Malaysia menjadi hos Dialog Antarabangsa Langkawi (LID).

Dialog itu merupakan platform untuk Perkongsian Pintar termasuk ketua kerajaan, ketua perniagaan, ahli sains, ahli akademik dan ketua pelajar untuk berjumpa dan bertukar idea serta pengalaman berhubung kait dengan Sains, Teknologi dan Inovasi (STI) dan bagaimana STI boleh digunakan untuk membawa transformasi sosioekonomi kepada benua Afrika.

Sepanjang 18 tahun, penganjuran dialog itu bersilih ganti antara Malaysia dan negara di Afrika dengan dialog terakhir di Afrika diadakan di Uganda pada 2009 dan LID pada 2011 di Putrajaya.

Dialog kali ini dianjurkan bersama Commonwealth Partnership for Technology Management (CPTM) London.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=959483>